

# Teleu Basoak

~1~

Meno o adé rajo sugéak. Bapak ne o sugéak lut. Anak ne adé teleu. Teleu basoak o kemelebéak cu'ik ne. Wakteu si bi lei jano kelak anak ne o, tenotoa bapak ne. Sapié lei gi maju cu'ik.

Bapak ne matié. Matié, tingā iñok ne igei. Wakteu tingā iñok ne o, an-an, matié kulo iñok ne o.

Si yo kemelebéak nien sugéak ne. Hak deu. Biaso cu'ik nano, coa lak bekakok. Jano adé nak dasié ne o. Misal ne umei ne libea, cigei caci. Si jemuoa umei. Sudo jemuoa umei, bi abis kulo tokoa umei. Si jemuoa kulo areak umeak ne di leyen ne. Umeak ne o deu. Udo o bi cigei kulo penan ne. Umeak ne déwék tak ne jemuoa. Biak hak tobo yo.

Teleu basoak selawié kete yo nano. Asoak ne di piset yo tun penyebit. Si yo genyei tema'ak pekué jisanak ne o. Jisanak ne coa lak temotoa. Tobo yo bi cigei adé hak. Tobo yo melarat aleu mai beak im̄o. Wakteu melarat mai beak im̄o, jano nem̄in ne beak im̄o: pitat, petus, linḡis. Diyo ba di adé ngen si igei.

Sapié nak beak im̄o, nadeak asoak ne, "Dang oak ige ite mai beak im̄o yo. Bé adé benatang buas. Jibeak ba menea poñok nak piyo baé," nadeak ne. Udo o si menea poñok nak beak im̄o o. Bi an diem beak im̄o. Bi ke'ing kulo dawen puea, minoa poñok ne. Nadeak asoak ne, "Cenubo makié dawen lalang kulo. Dawen lalang o biaso ne padék. Wakteu ite gi sugéak belo o, anak bueak bapak o awit menea atep ke'ung sapei te ngen dawen lalang," nadeak ne awié o. Ijei nenea poñok, atep dawen lalang, jije

poňok ne.

Adé rajo kunai tebo lei, mai mebureu mai beak im̄o o. Wakteu rajo o mebureu keneléak ne adé poñok nak beak im̄o o. Do kulo tenengoa ne adé sa'ié tun ngota. Wakteu si ngota o rajo o mim̄ang jano kécék tobo yo.

Nadeak di tui su'ang magea di asoak ne nano, "Jano kelak nu, Asoak?"

"Lebéak baik jisanak madeak kelak dete."

Nadeak jisanak di tui o, "Kelak ku lak jije babu rajo. Jano jije tukang kesak ne, ijei tukang tepap ne, maro!" nadeak ne. "Asal uku em̄uk baik, em̄uk monok, em̄uk jano baé adé."

Sudo o nadeak di nomor duei o. Nadeak ne, "Uku temotoa kelak jisanak kulo.

"Amen jisanak mepuk ping̃an, misal ne, uku semupeu umeak. Amen jisanak semupeu umeak, uku mepuk ping̃an. Pokok ne jano kakok jisanak uku temulung. Temotoa jano kelak jisanak," nadeak di nomor duei o.

Ijei o jisanak ne di tuei su'ang o temenei ngen asoak ne di piset o.

"Jano kelak nu, Soak?" nadeak ne.

Asoak ne yo jemawap, "Uku lak ijei ngenyan rajo."

"Ku'ang ajea ko a! Awak kidék! Awak titik lak ijei rajo!" nadeak jisanak ne. Coa si nam pakei asoak ne di piset su'ang o di paling alep, di paling pacak ne.

Wakteu rajo gidong mim̃ang o nano, tenengoa cerito o, lajeu cigei si mebureu. Si o semelidik ne jano tun nien, jano tobo yo semat.

Sudo o si mepék taño nak keliling poñok o mako si coa limeu teko igei ke'ung yo ne. Udo o rajo o bélék mai penan ne igei.

Udo o teko kaben yo keduei. Si em̄in tentera ne. Tun teleu basoak o senergap ne. Sudo si semergap si em̄in tun teleu o mai sadié ne. Wakteu em̄in tun teleu o, si em̄in ne o ca'o baik-baik. Temanyé ngen baik ngen tun teleu o. Wakteu si sapié nak umeak rajo o, tun teleu basoak o senam̄ut tun ngen baik, awié kulo rajo.

Kete ne madeak: "Ngen dipe rajo lak napag?"

Udo o rajo madeak, "Uku lak napag ngen saleak su'ang tobo yo, ngen ca'o te, makié pengelié, temotoa ca'o Ejang. Makié kejei awié tun um̄ung biaso ne," nadeak rajo.

Ijei o wakteu si lak napag, di teleu basoak o madeak. Nadeak jisanak di tui o, "Oi, lajeu asoak te nien, napag ngen rajo yo."

"Ite temotoa baé," nadeak asoak ne nomor duei o." Jano kelak te belo o? Jisanak lak jije tukang mepuk pinḡan awié o."

Rajo yo nano bi temengoa wakteu nak poñok o. Ipe kulo si yo lak ngen di titik, si alep kulo. Di duei o nano nelok ne ba tukang kesak. Areak em̄uk mié nelié ne, daging monok, jano kelak ne nelié ne.



**“Oy, rupanya adik kita betul yang jadi nikah dengan raja ini.”**

Jisanak ne duei o agak jengik kemeléak asoak ne o. Rajo gidong aleu mai negrei leyen, asoak ne yo nano belepas. Lahér adé anak ne semanié. Meding si jengik kemeléak asoak ne o, si di ijei babu ne. Tak ne mukus anak ne o. Nukus, si mepék nak lem petei tak ne monot di sungai Ketawen.

Monot, jjei bi oak monot. Temeu ngen tun tuei gidong mai bioa. "Jano gén do o?" nadeak ne. Ptei sakut nak tebet nak di o. "Jano si areak alat tun monot? Teak, umeak tun monot."

Sudo o si mak, ne $\bar{m}$ in ne petei o. Sapié nak umei ne nak penan ne diem o si mukak. Nukak, keneléak ne adé titik nak lem o gidong tawei, semanié. Udo o semanié o tenegén ne.

Gén ne Ujang. Meding si coa dé anak, sayang lut si ngen Ujang o. Bi lei titik o si majea. Najea ne awié ca'o tun leyen majea anak ne nien.

Ijei o ite bélék mai cerito madeak penan jisanak ne duei basoak o mamung titik o nano. Tak ne gemitié ngen anak kuyuk, anak ne nien nonot ne. Ijei o, wakteu rajo bélék, selawié duei nano, jisanak ne o, madeak ngen rajo, "Oy, Rajo!" nadeak ne. "Asoak ku belepas, anak ne kuyuk!"

Rajo tekejir. "Maso!" nadeak ne. "Maso bié menusyo banak kuyuk! Do o coa te nam madeak ne!".

"Coa kémé adé temingā asoak," nadeak kedua kakaknya. "Teak ba bene kete ne nak lem kelak Tuhan? Asoak te yo belepas kuyuk," nadeak ne.

Rajo yo jengik. Panes, cuma coa si nam madeak ne kerno anak ne nien, sako ne o. O ba o si baik-baik midup kuyuk o, nidup ne kuyuk o.

Do o ba ra'yat deu o mimak, "Padeak rajo o anak ne kuyuk," nadeak ne. Coa ba rajo o kemian. Coa rajo o demulei.

Sudo o an-an ne. Ijei wakteu ngenyan ne o gidong kidék, ules ne o rajo aleu igei. Aleu igei, gidong rajo coa dasié belepas igei ngenyan rajo yo. Anak ne é semanié igei. Sudo belepas semanié, jisanak ne duei o menea awié belo o igei. Nepék ne lem petei, nukus ne baik-baik, di jisanak ne tuei o di monot ne.

Coa an sudo o, rajo o bélék, si madeak asoak ne bi belepas igei. Madeak anak ne kucing. Tameak jengik baé rajo. "Maso!" nadeak ne. "Bi duei kilei belepas, kuyuk, kucing anak ne o."

Ijei o si coa as kemeléak ngenyan ne. Ngenyan ne madeak: "Do o coa te nam madeak ne. Do o ba bagei te." Si temengoa kécék ngenyan ne awié o. O ba si sadar. Nadeak ne, "Amen bagei te awié o coa te nam madeak." Senido ne ba kucing o.

Ite bélék mai magea cerito di anak semanié di nonot nano. Wakteu em̄ié tui o gidong lak muang pegas mai bioa, kemeléak adé petei. Nematik ne, si em̄in, si mukak. Kemeléak adé cupik samo nien papa ne ngen di tenemeu ne dete belo o. O ba si temegén di nomor duei o Buyung. Tun duei o temanang coa dé anak, ijei o riang lut si adé anak duei-duei.

O ba si majea tun duei yo. An-an bi lei kulo tun duei o, pacak kulo bepanuo. Pacak panuo, pacak miling. Ati jako ne pacak miling si bi miling. Ati jako ne pacak bepanuo si bi bepanuo.

Ite bélék mai magea cerito di teleu basoak o nano. Di ngenyan rajo yo arung sebit. Pogoá mékér. Gén padeak, "Anak ku ules ne awié kucing." Do o ba inok ne yo sayang ngen kucing. Negong ne, senium ne. Menginói si kemeléak kucing, ngen kuyuk o.

Sudo o an bi kean ke'ung yo ne igei. Rajo o aleu igei, ngenyan ne gidong kidék kulo. Sudo o wakteu rajo laleu, belepas kulo ngenyan rajo. Anak ne yo selawié.

Jisanak ne duei nano jan̄jing ngen asoak ne di jizei ngenyan rajo. Belepas di keteleu yo, cupik ne selawié, si menea igei awié belo o. Nam̄ung ne igei cupik selawié o, nonot ne. Ijei o waktau rajo bélék, bi genitié ne ngen anak kam̄ing.

Kerno siut, o ba jisanak ne duei o menea awié o nano. Maksut ne gemitié yo kerno si kemelebéak lak kulo ngen rajo. Kaleu ngenyan ne o sena'ak ne, ke'ung yo si di jizei ngen rajo. Nadeak ne, "Aturan ne ite belo o jizei ngenyan rajo riang ite, lajeu asoak te. Bagei te tukang kesak. Si idup senang," nadeak ne.

Sudo o waktau gemitié ngen kam̄ing, bélék rajo. Ijei o rajo o madeak. "Do o cigei si bejako," nadeak ne.

Ra'yat deu nak di o pogoā mimak rajo. Banak kuyuk, banak kucing, banak ka $\bar{m}$ ing, nadeak ne. Coa si dekmai ngen anak tun. Do o ba rajo o p $\acute{e}$ k $\acute{e}$ r, "Bene keselé yo ngenyan ku yo? Ami ngenyan ku yo iso si tun? Jano yo benatang?"

Udo o teko tentera rajo. "Si awié yo, rajo," nadeak ne. "Ngenyan nu yo iso si tun. Ite mékét ne baé." Né $\acute{e}$ két ne ngenyan ne o genatung nak iding dalen. Kékéa tangen né $\acute{e}$ két. Api baé melitas semisit selawié o. Tingā ba serwa ngen bajeu nak awak. Api baé melitas semisit ne. Daging ne senileak, nepék areak di pelgéak ne atau cuko. O ba pogoā mengamuk terus, tip bilei awié o.



**Sudah jauh anak itu hanyut ke hilir, ditemukan oleh orang tua yang sedang pergi ke sungai.**

Bélék te magea cerito mai titik selawié di nonot o nano. Penyudo ne tememeu tun tuei o igei. Wakteu tememeu tun tuei o madeak, "Do o petei, adé do igei. Asei ku cigei leyen tun o besi isei ne," nadeak ne. "Diyo adé ba penan cupik, aseu ku. Tun jengik kemeléak anak ne. Teak si anak apang, teak jano ba," nadeak ne.

Udo o si mak titik selawié o. Kerno si coa dé anak, nepék ne gén cu'ik anak ne awié o. Tenegén ne Upik. Ati jako ne si bi nam tawei bi tawei, ati jako nam panuo bi panuo, samo ngen di duei nano. Ba'es titik teleu o, dekmai baé papa ne, cuma dikup selawié.

Adé di ninik ne tun gerot deu ilmeu, deu pakié. Ijei o najea ne Ujang ngen Buyung yo nano. Najea ne besilé<sup>k</sup>, misal ne, an<sup>g</sup>ar, meni<sup>m</sup>ak. Ati si en<sup>g</sup>ut dapet ninik ne majea ca'o nien ne si bi pacak meni<sup>m</sup>ak. Udo o ninik ne o majea silé<sup>k</sup>. Ati si jako dapet si bi pacak. Penyudo ne o si o main pana. Main pana, ninik ne mepé<sup>k</sup> ja<sup>m</sup>eu nak das boloak nidik keno. Penyudo ne si kemelebé<sup>a</sup>k pacak ne duei basoak o. Tak ne meluk mi<sup>n</sup>as, sudo o nidik, keno. Kemelebé<sup>a</sup>k pidik ne. Tei ne o kepacak ne ngen pakié ne

Adé Upik nak dasié, adé pakié ne kenai. Tun o kemelebé<sup>a</sup>k nien alep. Temé<sup>n</sup>gék kudo pacak si.

Adé uleak ninik ne yo bilei-bilei. Uleak ne yo mebureu. Do o ba bok si majea Ujang ngen Buyung o mebureu. Mebureu awié yo ca'o ne meniṁak. Sudo o wakteu adé debilei ninik ne yo mai mebureu, si mai kulo. Tekeléak ne uso. Netak ne temiṁak, keno. Matié uso, nēmin ne bélék. Do o ba tun lemo nak di, ninik ne duei ngen teleu basoak, eṁuk daging o. Senang si.

Jano uleak ninik bié ne nak di o, tenanem ne areak bungei-bungei neraés ne nak keliling umeak ne. Si temanem kulo areak gén lapen o. Nelu'us ne ba'es-ba'es ne. Amen tun sapié ketén bungei o, alep. Tenanem ne areak boak-boak.

An bi kean ninik semanié ne yo bi tuei kulo. Udo o ninik ne yo matié. Matié ninik ne, tingā ninik selawié ne, ngen titik teleu basoak o. Upik betenei, "Jano adé pesan ninik semanié ayak si matié?" Ninik bié coa jemawap.

An-an Ujang ngen Buyung o pogoā mebureu areak uso, areak kijang. Amen si mebureu uso, coa si em̄et uso gidong tidoa o, gidong tejé tenim̄ak.

Nadeak Buyung, si lak kemeléak kepacak ne duei basoak o. Nadeak asoak ne, "Jisanak," nadeak ne, "di dipe tenim̄ak nu? Jano temim̄ak uso, jano temim̄ak kijang?"

Nadeak Ujang, "Uku lei, uku temim̄ak uso awié o a". Nadeak Buyung, "Amen ko temim̄ak uso diem ba nak piyo. Uku malau uso kunai doloī, im̄o doloī o." Uso gidong mengacap kedelas jano ne. Ujang temim̄ak keno matié uso o.

Sudo o si lak kemeléak gerot asoak ne. "Ko titik ko temim̄ak kijang," nadeak Ujang. "Uku malau ne o." Sudo nalau kijang, kijang o gidong melitas kemelebéak delas ne melilei. Buyung temim̄ak keno kulo. Areak daging coa si tekem̄uk igei.

Ijei o, uleak Upik nak dasié, kerjo ngen ninik. Jano uleak ninik ne? Misal ne o menea areak bajeu makié benang, menea areak sauk. Najea ninik ne ca'o tun temakep kan.

Ijei o wakteu Ujang ngen Buyung bélék medasié, adé manat ninik ne ayak si matié. Si o teminḡa magea ninik bié ne. Nadeak ninik ne ngen Ujang ngen Buyung, "Jemago asoak udi yo baik-baik! Pesen ninik udi. Dang sapié asoak udi o celako atau sileak sebab asoak udi yo gi titik. Senḡeak si titik yo mémang si yo pacak."

Manat ninik semanié ne, adé kulo ngen ninik bié. "Amen Ujang ngen Buyung lak mebureu, jibeak galak mai tebo luea kunai tebo penan ne galak magea. Sebak amen si mai tebo leyen bé adé celako atau dapet hai atau balak. Sudo o, ninik ne coa nelié namén wakteu Buyung ngen Ujang aleu mebureu mai īmo leyen.

~6~

Wakteu mebureu mai īmo leyen, temeu si tun gidong mesoa ebes. Jije i tun gidong mesoa ebes o tekjir, nadeak ne awié yo magea tun duei yo, "Jano neso a udi aleu beak īmo yo?"

"Kémé yo aleu mesoa uso ngen kijang."

"Oy", nadeak ne, "nak piyo deu lut kijang. Sebak korok yo awit tun mebureu kulo. Genyei si temim̄ak uso o coa lak keno," nadeak ne.

Nadeak Buyung, "Padeak kecalak uso piyo!"

"Nien," nadeak tun mesoa ebes o. Sudo o wakteu si madeak awié o melitas uso.

Tukang ebes o temun̄juk dé'é. "Uso melitas! Tim̄ak ba!" nadeak ne. Uso melitas temengoa. Wakteu tukang ebes o madeak, uso o tebedan.

Nadeak Ujang, "Amen meloak uku temim̄ak uso o, mai kalau ne! Keloak si melilei!" Aleu tukang ebes o malau uso o. Uso o gidong melilei. Si melilei kelebéak delas ne. Netak ne temim̄ak, keno, matié uso o. Ujang melié ngen tukang ebes o. Ijei o tukang ebes o nano cigei mesoa ebes. Kelebéak riang dapet uso nano, si bélék. Bélék, tukang ebes o nano em̄in mai sadié ne, penan Ujang ngen Buyung yo lahér. Si em̄in uso o, si majak tun medu'o ca'o ite Jang ba. Nedu'o tun deu. Nedu'o ne kulo rajo.

Amen rajo kemeléak uso o, tekjir si. "Jano?" nadeak ne. "Wai ipe udi mak uso o? Kémé baé mebureu uso coa dapet," nadeak ne.

"Uso yo iso si dapet ku idup."

"Nemak nu?" nadeak rajo! "Ko melié tun ēmuk bukié uso?" Awié o, lak nengéak ne semanié tukang ebes o.

Jawap ne, "Coa si uku monoak ne awié o. Adé tun duei mebureu uso. Titik kelebéak nien ba'es ne. Bi lak dekemai ngen papa nu kulo," nadeak ne awié o.

Sudo o nadeak rajo o, "Amen awié o, maro ba! Tengén titik tobo o galak mebureu?" nadeak ne.

"Asei ku uyo tip bilei si mebureu mīni, si awit buléak."

Sudo o penyiep ba rajo o ngen tentera ne lak aleu mebureu. Tentera ne mileu. Kaben yo nano awié tun lak aleu mañun perang, jano lak mañun mesoa uso nien. Tukang mesoa bes mai temuñuk penan ne.

Si aleu mai beak īmo. Wakteu mai beak īmo tememeu kulo ngen titik duei é, ngen anak rajo yo. Si coa namen. "Jano uleak udi yo?" nadeak rajo.

"Mesoa uso," nadeak Ujang.

"Kémé yo lak mesoa uso kulo nak piyo. Lak berpak ite mesoa uso," nadeak rajo awié o.

"Amen lak mesoa uso," nadeak tukang ebes o, "nak di gi adé."

Nadeak Ujang o, "Maro ba te temim̄ak ne amen adé." Decang udo o tekeléak rajo uso. Rajo o kemeléak uso o. Nadeak ne, "Dé'é uso a! Mai ba tim̄ak ne!"

Buyung madeak, "Amen meloak k  m   temim  k ne, jibeak temim  k gidong tidoa. Amen lak temim  k gidong tidoa, tim  k ba kak rajo." Rajo yo temim  k uso o, coa keno.

Sudo o nadeak Buyung o nano, "Ay, dang kumu mai mebureu temotoa k  m   amen barat yo. Kel  k ca'o k  m   amen lak temim  k uso," nadeak ne. Decang sudo si madeak, ad   kulo uso melitas.

Nadeak rajo, "D    uso! Tim  k ba!

"Amen meloak uku temim  k," nadeak Buyung, "aleu kalau ne, keloak si melilei." Mai rajo malau. Uso gidong melilei keleb  k nien delas ne. Netak Buyung o temim  k ne, keno. Mati   uso o. Rajo o sapi   cengang. Cengang, melitas kulo kac  a gidong melitas kemeleb  k delas ne. Netak Ujang temim  k kunai belakang, mati  . Sapi   rajo o s  l  g.

Sélég rajo, anak bueak rajo o bi mengéak kulo. "Udi tun ipe?" tenei ne.

"Kémé diem beak im̄o. Diyo ba uleak kémé," nadeak Ujang.

Nadeak tentera rajo o, "Udi lanḡuk nien diem beak im̄o. Kémé diem sadié, coa si awié udi."

"Coa kémé lanḡuk, do o ca'o kémé," nadeak Ujang.

Nadeak kulo tentera rajo o, "Amen udi lak nien tañing te, tai ba ite tañing uyo!"

"Tañing jano kelak udi?" nadeak Ujang. "Amen udi lak majak kémé betañing, tai ba ite temim̄ak boak léméu nepék nak ujung boloak," nadeak Ujang awié o .

"Maro!" nadeak rajo. Coa rajo namen anak ne di betañing o.

Sudo o, Ujang madeak tim̄ak kak rajo dete. Tenim̄ak rajo, coa keno. Sudo rajo, nel oak ne kulo anak bueak rajo kulo temim̄ak. "Tulung tim̄ak kak udi," nadeak Ujang. Bi adé abéak teleu poloak lai teme leu temim̄ak coa dé si di keno.

Sudo o rajo madeak, "Sapié gé lé a udi. Tim̄ak ba kak udi!" nadeak ne. Ujang o temim̄ak, keno. Pecoak lé mé u o.


Nadeak Ujang, "Udi lanḡuk. Lak majak kémé beto'oak. Beto'oak temim̄ak lé mé u yo baé, coa udi keno. Amen udi lak kemelé ak kepacak te, awié yo!" nadeak Ujang. Si mak boak lé mé u, si meluk. Buyung temim̄ak, pecoak kulo lé mé u o. Tobo duei yo nano o najea ninik ne sak kunai titik. Tenawei ne baé tun majak betan̄ing é.

Ijei rajo yo panes atié ne. Rajo yo bélék mai sadié ne. Ayak si bélék, si madeak ngen tun duei o, "Nak ipe udi diem?"

"Kémé diem nak beak īmo."

Nadeak rajo o, "Ke'ung yo kémé aleu meto mai beak īmo, penan udi é."

"Buléak baé," nadeak Ujang dan Buyung. Sudo o si aleu. Ujang ngen Buyung yo bélék mai penan ninik ne. Rajo o bélék kulo mai sadié ne.



**Belum anak-anak itu diajarkan menémbak sebenarnya,  
mereka sudah bisa menémbak.**

Wakteu si bélék mai penan ninik ne o, ninik ne gidong sakit. Ninik ne o madeak ngen si. "Uyo cigei an igei idup ku yo. Udi yo iso si anak ku, iso," nadeak ne. "Udi dapet ku monot, udi teleu yo. Uku madeak di nien ne. Udi gi adé iñok ngen bapak."

Tekjir titik teleu basoak o. Si o beiñok magea ninik ne o. Nadeak ninik ne o, "Udi dang beiñok magea uku. Udi beninik baé," nadeak ne. Udo o si mengiñoi temengoa cerito o. Si yo iso si anak iñok ne o. Si diem ngen ninik.

Adé pesen ne o. Nadeak ninik, "Udi duei semanié yo arus jemago asoak di selawié yo baik-baik, dang sapié adé celako. Jano kelak asoak ne o dang coa mak, dang coa melié," nadeak ne.

"Au," nadeak Ujang awié o.

"Jjei ba dé'é, Ninik," nadeak Buyung. Ijei o titik teleu o kelebéak nien ibo ne temi'uk ngen pesen ninik ne o. Ninik ne o meningā. Si kemoboa nak lé'ét ji'et ninik semanié ne. Sudo kenoboa nelé'ét cupék, titik teleu yo pogoā ngiñoi.

~8~

An sudo o, Ujang ngen Buyung aleu mai mebureu. Ijei o si bélék, Upik madeak.

"Uku adé kelak ngen Jisanak."

"Jano?" nadeak Ujang ngen Buyung.

"Uku adé pesen ninik," nadeak Upik. "Ninik meloak mak bioa pacoa o kunai rakso, meloak mak bungei pacak berjung, meloak mak burung pacak miling. Penan ne nak Tebo Sam nak doloi o."

Ujang ngen Buyung madeak, "Ijei ba amen si madeak awié yo."

Si namen, jano kelak asoak ne o, ninik ne madeak, dang coa mak awié o. Kinget, mak kudo ne. Si mepék nak denam poñok ne lajeu madeak ngen Upik. "Ko diem ba nak poñok yo baik-baik. Dang ko laleu. Gén kemuk nu cukup. Kean kémé yo laleu. Ko arus kemeléak taño kémé. Amen kémé dapet kelak ninik atau kelak Upik, mojoa ba. Amen coa, coa te nam madeak ne," nadeak Ujang awié o.

Ayak si aleu o si menea taño. Adé di Ujang mepék pingan das lémén. Nepék ne baik-baik. "Amen pingan yo pecoak taño uku matié," nadeak ne awié o.

Sudo o Buyung gematung pisuo nak das pageu. Nadeak ne, "Amen pisuo ku yo bé ngecacak daleak mai pingan jisanak, taño ne uku matié kulo."

Sudo o aleu ba si duei basoak. Coa si aleu mai do pemanuo. Leyen. Misal ne dalen yo becabang duei. Aleu di Ujang aleu kak yo, Buyung aleu kak di.

Wakteu Ujang o aleu kak yo, sapié si nak sipang. Si tememeu tun tuei. Tun tuei madeak, "Amen ko lak mai mīni, jano keneléak nu nak dalen, dang monoak ne. Dang ko demulei ne. Mai ba, ko laleu terus," pesen tun tuei o nano.

"Ijei ba amen awié o," nadeak ne. Coa an sudo o, nak dalen keneléak ne imuo, keneléak ne siamang, keneléak ne uso melitas o, keneléak ne kelewang kelei umeak mengekik iding ti'uk ne. Si rényéng. Rényéng si bi lak sapié nak tebo, kerno temengoa nadeak tun tuei nak sipang o, nano—"Jano keneléak dang temim̄ak ... amen ko temim̄ak udi adé bahayo"—terus ba si laleu.

Kelebéak deu di gemurék si nak dalen. Si lak temim̄ak benatang. Wakteu si lak temim̄ak imuo o, ijei ba si buteu. Matié. Ujang jije ba si buteu.

Tinḡa ba Buyung. Terus bekesoa, terus bekesoa, limeu dalen. An-an tememeu dalen becabang duei, penan Ujang betenei nano, tememeu ngen tuei o. Nadeak ne, "Bene ko nak piyo?"

"Uku coa nam dalen ne. Uyo uku lak temotoa dalen jisanak ku baé," nadeak ne.

O ba tun tuei madeak, "Jano keneléak nu nak dalen, dang ko gemurék."

"Ijei ba," nadeak ne. Si terus bekudo. Bekudo, deu ba mecem penemeu ne. Penyudo ne si kemeléak burung. Burung o mengekik. Sewa'o ne pogo mekak. Buyung o lak temim̄ak. Ijei buteu kulo Buyung yo ngen kudo ne.

Bélék ite ngen Upik di tingā su'ang nak poñok nano. Si kemeléak taño di Ujang, pingān ne pecoak. "Bi matié jisanak ku." Kemeléak di Buyung, pisuo ne bi ngecacak daleak mai pingān pecoak. "Ai!" nadeak ne, "Amen awié yo jisanak ku matié kete." Upik menyiep areak alat-alat ne, areak juadeak nemin ne kulo. Si mak kudo. Ayak si laleu, Upik mai magea ji'et ninik ne. Nadeak ne awié yo, "Ninik, uku yo aleu mesoa jisanak ku. Matié kete. Uku lak mesoa bukié ne. Amen si idup kinai te bé, moja," nadeak ne. "Amen si matié bé cigei te nam madeak ne."

Udo o Upik temengoa sa'ié o kunai ji'et ninik ne o. "Mai ba. Uku meloak ko laleu."

Lajeu ba seak. Upik laleu semesung lat jisanak ne. Si tememeu ngen tun tuei nak sipang penan Ujang ngen Buyung betenei. Nadeak ne, "Lak mai ipe anguk nu, Gadis?"

Nadeak Upik, "Uku lak aleu mesoa jisanak ku."

"Totoa dalen yo, dalen penan nelitas jisanak nu yo nano. Tapi ada jan̄jei didik," nadeak ne. "Jano baé benatang gemurék ko, ko dang monoak ne."

"Ijei," nadeak ne awié o.

Ayak si aleu, Upik mepék kapes nak ti'uk ne mako coa deu gén tenengoa ne. Si aleu bekudo. Nak dalen cem-cem penemeu ne, cuma coa si temengoa. Coa an keneléak ne jisanak di beduei o bejijei buteu. Nḡiñoi si kemeléak jisanak duei o.

Wakteu si nḡiñoi, sapié burung. Burung yo pacak miling.

"Ko lak aleu mai ipe, Gadis?" tanei burung.

Upik o cengang. "Uku teko miñai lak mai magea jisanak ku," nadeak ne.

Nadeak burung o, "Nien, uku bi nam cerito kete ne. Jisanak nu yo tun gerot. Coa lak tem̄eak kūneu. Sifet ne o em̄in sifet tun gerot," nadeak ne. "Uyo adé ca'o ne. Kemak sarat. Mak sergayeu ngen bioa. Bioa o nūnak ngen bioa belas didik, necik mai buteu o. Do o ba sarat ne," nadeak burung o. Upik mak bioa di nadeak burung o nano. Si mecik kékéa tangen tun jije i buteu nano. Ujang ngen Buyung idup igei. Kudo di jije i buteu nano bélék idup igei.

Ayak si lak aleu, burung teko. Nadeak ne magea Upik, "Adé nien pesen?"

Padeak semulen o, "Adé nien. Lak burung pacak miling, bungei pacak menyanyi ngen bioa macoa kunai rakso."


Nadeak burung o, "Kemak nak Tebo Sam o. Coa si oak kunai yo."

Lajeu dekuat teleu basoak o ngen burung pacak miling o. Mai si mak ne.

Wakteu si em̄in bélék, bungei negong ne yo menyanyi. Di burung o miling, bi jjei kuat ne, mileu tobo o bélék. Wakteu em̄in, bioa macoa kunai rakso nano, cemimié awak ne.

Tobo yo bélék mai poñok ne. Bioa macoa kunai rakso nano, cenu'ié ne mai iding ji'et ninik ne duei o. Adé di bungei pacak menyanyi o nano, tenanem ne nak natet di keno angin-angin. Adé burung pacak miling yo nano nepas ne baé. Jano nadeak tun tenotoa ne.

Ijei o bi senang si kemeléak awié o. Wakteu si gi titik belo o deu temanem areak boak-boak, areak jam̄eu, areak manḡus nak natet o. Bekboak kete tanem-tanem ne nano. Manḡus ne uyo gidong mesak.



**Kami mencari burung yang dapat berbicara, bunga yang bisa bernyanyi, dan air mancur dari air raksa.**

Ujang dan Buyung aleu mai meto. Wakteu si laleu sapié ba nak penan sadié rajo o. Sapié nak di o, si lak majak rajo mebureu. Lak meñes rajo o aleu mai mebureu. Rajo yo lak najak aleu mai mebureu.

Ayak si laleu, tobo yo kemeléak adé selawié tepékét. Nadeak Buyung, "Bene selawié o di no Goa udi semisit?" (Coa si namen do o iñok ne tun duei o.) Selawié o tecengang kemeléak tun duei o. Cigei si meding tun semisit awak ne, mepék areak cuko. Cigei si meding pelgéak kemeléak tun duei o, asei-asei anak ne. Mémang anak ne nien, cuman si coa namen. Coa rajo yo kemian selawié tepékét o nano. Rajo yo bangso temengoa nadeak anak bueak ne. Tobo yo lajeu aleu. Selawié tepékét nano pogoa ngiñoi kemeléak titik duei o.

Rajo yo mebureu coa si awié lak nien. "Amen awié yo," nadeak Ujang, "meto baé ngen kémé." Sapié nak poñok, tenengoa rajo rami sa'ié tun menyanyi. Bungei menyanyi nak penan di keno angin-angin. Keneléak ne bioa macoa miñas. Mémang bioa macoa kunai rakso. Burung becénéu miling. Do o kulo o, kea umeak ne o licin awié bioa ne, kerno kegerot ilmeu ninik ne o belo o.

Si kemeléak awié o, nadeak rajo o, "Padeak keba'es penan udi yo! Areak bungei deu, pengeléak ba'es, boak-boak deu." Rajo yo tecengang. Burung o meduo rajo mai dasié. Rajo o mai dasié, semesing serwa ne.

"Bene semesing serwa, Rajo? Iso si bioa dé'é. Diyo ba penan te," nadeak Upik o.

Rajo o tecengang kemeléak awié o. Rajo o temot. Rajo temot samo bepékér: "Diyo ba baik nebut ijei penan negrei te. Amen ite temuan penan yo, coa si an̄gen keba'es ne. Tekujat penan te bé."

Anak bueak ne nano coa mai dasié igei. Pogoā ēmuk boak. Coa an udo o lak bélék rajo yo. Si madeak ngen tun teleu basoak o, "Uku bélék," nadeak rajo o. Ijei bélék kete rajo ngen tentara ne o nano.

Coa an sudo o rajo teko igei mānun tobo yo perang. Lak mebut talang tun teleu basoak o. Sapié nak di o, anak bueak ne coa dé nyut perang kemeléak boak deu o. Tentara ne pogoā ēmuk boak. Cuma burung o namen niat atié rajo o. "Si o lak merang ite," nadeak ne. "Siap ba udi!"

Rajo yo nano lak medasié temim̄ak tun teleu basoak o. Kemeléak anak bueak ne mogoa em̄uk boak. Sénéak kulo rajo lajeu buyé lajeu em̄uk boak kulo bekenék pun boak-boak o.

Rajo yo tu'un gacang-gacang, bi kenyang. Anak bueak ne o bi lak perang igei. Sudo o burung o madeak, "Uku namen maksut udi teko miñai. Coa udi lak baik, coa. Udi lak kidék, lak merang tun teleu basoak yo," nadeak burung. "Kerang ba! Tim̄ak ba kémé," nadeak burung o!"

Kemeléak awié yo, rajo yo panes. Netak ne temim̄ak. Titik teleu o gidong bel'éét nak di. Burung nano diem nak das atep. Nogoja rajo temimbak. Coa dé keno. Tobo yo deu pakié ne.

Tenawei ne baé. "Amen udi lak mebut talang kémé, coa udi nam," nadeak ne. Rajo yo sapié sélég ngakok. Rajo yo ngakok. Rajo o bélék, coa dé penan mepék papa sélég ne.

~10~

Wakteu rajo bélék, burung madeak ngen tun teleu basoak. "Pesen ninik udi belo o wakteu udi gi titik," nadeak ne. "Amen udi lak namen īnok ngen bapak udi, tapi diyo bahayo. Udi arus mai sadié leyen. Nak di adé tun kidék di lak monoak udi. Do o pesen ninik udi belo o," nadeak burung. "Amen udi lak mai mīni, udi arus kemetén kegerot udi kileak," nadeak burung o. "Jijeī Ninik melié udi yo ujien di be'et ne. Ninik meloak udi mesoa bungei pacak berjung, udo o ngen bioa macoa kunai rakso."

"Uku burung di pacak miling. Uku kulo neloak Kakék temulung udi. Udi arus gerot ngen binei. Udi yo arus dapet! O ba pesen Kakék ngen uku belo o," nadeak burung magea tun teleu basoak yo.

Udo o adé di igei pesen ninik: "Amen tobo yo kemerjo jano-jano, tulung-menulung samo ne, kete di neloak pesen Kakék nano, mako Kakék meloak uku utuk kemetén bukeu yo. Bukeu yo bisei cerito asal-usul kalian, in̄ok ngen bapak ne nien."

"Diyo," madeak burung o ngen tun teleu basoak o. "Baco bukeu yo, mako udi namen api udi di sebenea ne." Lem bukeu yo adé petun̄juk mai sadié rajo. Lem bukeu madeak, rajo o téak ne.

Ujang, Buyung dan Upik aleu mai magea mai sadié rajo. Aleu mai mīni o, melitas penan tun selawié di nékét nano. Keneléak ne selawié di nékét o, si tinget. Asei ne adé nak lem bukeu ninik ne nano. Udo o si betanyé ngen tun nak di o. Nadeak Ujang, "Api si gén selawié tepékét o?" Tun madeak gén tun genatung o. Madeak gén ngenyan rajo. Jijey, di genatung o īnok ne.

Sudo o, Ujang meloak Upik utuk jemago īnok ne. Ujang ngen Buyung aleu magea rajo.

"Kumu Bak!" nadeak ne ngen rajo.

Wakteu si madeak 'Bak' ngen rajo, rajo tekjir. "Uleak kulo ko bebak magea uku?"

Nadeak Ujang, "Awié yo, Rajo. Diyo ba bukeu ninik ku. Kémé lahér, gi titik belo o, ninik midup kémé," nadeak ne. "Temeu si kémé nak jeke'ung bioa Ketawen, kémé teleu basoak yo."

Rajo mukak bukeu o nano. Tinget rajo. "Diyo anak ku," nadeak ne. Tinget si nak lem atié ne, diyo pekué jisanak ngenyan ne. Si megep anak ne yo nano. Anak perpuan ngen ngenyan ne gi nak dalen. Īnok ne jenago Upik ngen baik. Cigei si meding lukō ne igei. Betakup igei kemeléak anak ne o. Si ngiñoi. Ngiñoi, téak ne mai temetok tilei pékét ĩnok ne o. Nadeak ne, "Coa si saleak nu. Diyo ba anak te nien."

Ujang, Buyung dan Upik temu'un ĩnok ne di genatung nano.

"Coa si pekué ku diyo," nadeak ĩnok ne.



**Raja memeluk anaknya berdua ini. Anak perempuan dan isterinya masih di jalan.**

"Coa si ne," nadeak rajo. "Diyo adé ba pekué wak nu beduei o." O ba si o betaup lemo banak samo ngiñoi.

Ngiñoi sapié pa'uo wak beduei o nano. Tentera o madeak, "Diyo pekué jisanak ngenyan kumu, di duei basoak o nano. Kémé monoak ne baé." Wakteu madeak lak monoak o nano, si mékét selawié duei o. Netak tentera rajo o monoak. Tapié anak teleu basoak lak madeak "Dang monoak!" jano, bi putus kagen tun duei o. Matié jisanak ne duei o bales pekué kidék ne nano. Tentera rajo déwék monoak ne.

Ijei ngen yo ba cerito Teleu Basoak yo.

*Temanem pai bekboak pai,  
Temanem lalang bekboak apei.*



## **BACAAN SEBAGAI PETUALANGAN**